


"AÑO DE LA REGIONALIZACION"

MATSESEN CHIAMPID



Nëish matses istuidaid

Naden: -Piushën bënuac capuquin nëish matses isoshambi -quequin con matses mëdimbon chuipac cadened chuinu. Capuec nidpac cadenec. Abi nidec. Abi nidec. Abi nidec.

Nidquimbien piushëmpi pictsëcquidëmpi bedpac cadenec. Beshun podqued pocuenuidtsëcshumbi posnoen cüeste tepac cadenec. Cüeste teshumbien posac cadenec.

Adashien ushë abucquio icsho isash: -Podqued cuëman nidquin shuinte cüesbidanec nidnu -quiac cadenec.

Ashobien bënuapac cadenec. Podqued nibëdec. Tantiadenquo.

Adoaquien capucuen-capucuempac cadenec. Abi capucuen-capucuenec, piushën niac.

Capucuenequimbien shaëba istuidquin, tauac cadenec. Isquien tiedëmpi sedquepec. Ashun isquien tiedëmpi neshcaic, shaën.

Ashobien tutuapac cadenec. -Tu tu tu tu tu ëë aaaa. Abi nidendac, mama shaë -capac cadenec.

Adoaquien: -¿Con na nibëdacnodabi mama shaë caben-cabenec? Ebi mama shaë caic -quianec mecte sanan-sanampamboec pudunchopac cadenec. Cüeste caic mecte quiac cadenec.

Pudunchoshobien: -Èbien nec, mama -capac cadenec.

Adoaquien: -Che. ¿Con namenda niash? -quepac cadenec.

Adashien: -Cho, mado -quepac caondash.

Adashien: -Sia mëcuësnu cho, mado -quepac caondash.

Adoaquien: -Nid -quianec podquedën nidpac caondash. Abi nidec. Abi nidec. -¿Mida padquiden capec? ¿Tied nantanda capeque? Dectad cuësun chepëmbi -quiac caondash dada. Abi nidquimbien.

Abi nidquimbien cuëte tayun uëdësh-uëdëshcadopac caondash. Adoaquien shiëdë daëdpen tsadcuempac caondash, dëbiateno pichi-pichietsëcquiec.

Adashien padequi tsadpac caondash, shoebudash andëctsinquebudash.

Yuecquimbe tsadashien: -Mënëd-mënëdantsec -quepac cadenec. -Pemambo ictsec -quec adac cadenec.

Ashumbien chishoncodo istuishun pebanac caondash.

Ashun masioco dènesquin piøndash -quepac caøndash.

-Aidoshenda sia caposh. Ashumëntsimbi tied nantan dampoc.
Tied nantan cuëspanoequimbi danoc -quiac caøndash bënuaid.

Adashien shaë: -Sia misintsen isec nidnu, mado yësh
-quepac cadenec.

Adanec nidquimbi padpiden uedëshcadopac caøndash.

Adoquien shiedë misinëmpi tsadcuempac caøndash. Adashic
padpidimboec padequi tsadoapac caøndash.

Yuectaniashien: -Nëidien mënëd-mënëdantsec, mado yësh.
Nidnonid -quetanec chopac caøndash.

Adashien: -Mado, nëmbo mama tsauesën podqued nidendac.
Masi potebidantsec nidacnobi mama tsaues tied yec -quepac
caøndash.

Adashien nestuidpac cadenec. Adashic shubuno chopac
cadenec.

-¿Atotsi chiaid iso? -quequin chuimiaid

1. ¿Atotsi nasho podobitsin matses bënuapac
cadenec?
2. Bënuac capuquin ¿tsutsiba istuidpac cadenec?
3. ¿Atotsi acsho istuidpac cadenec?
4. Istuishun ¿mitsipaden matsesën cuëmpac
cadenec, papa quequin?
5. Adoac ¿atotsi epac cadenec shaë?
6. ¿Atotsi sanan-sanampamboec pudunchopac
cadenec?
7. Dada puduedacsho ¿atotsi acnu cho quequin
buampac cadenec?
8. ¿Siambobida capampic?
9. Choquin: -Nëmbo iquec -quequin ¿atotsi
chuipac cadenec?

Choshon puduedshun isquien di daëdpen tsiadec.

Ashobien: -Mama, min di utsi ëbi tsheshun -capac cadenec.

Adoquien: -Di nibëdec, mado -quepac cadenec.

Ashobien: -Ma nè di tsiadpayoc, mama -capac cadenec.
Adoaquien: -Tèotadte nec -quiac caondash.

Ashobien: -Ma uguëctsec utsi tsiadpayoc -capac cadenec.
Adoaquien: -Tauëdadte nec -quepac cadenec.

Ashobien: -Ma uguëctsec utsi tsiadpayoc -caquien:
-Mëotadte nec -capac caondash.

Ashobien: -Ma uguëctsecquid -caquien: -Inotate nec
-capac caondash.

Ashobien: -Ma uguëctsecquid -caquien: -Mënsis otante
nec -capac caondash shaën.

Adashien: -Mado, ëbi tsitëdoec cho -quepac cadenec.
Adoac aïdbëdi diadtopac cadenec, ëdi mapi budcuempamboec.

Ashumbien shaën dëtsipistonepac cadenec. Adoaquien
matses dëmumëdtonetsëcquiec diadquin uicchun
pidbud-pidbudpac cadenec. Caëshcainquiocquin
pidbud-pidbudpac cadenec. -Ushnu -cac icsambo tsipis
noadpac cadenec.

Adashien badiadte anoenquiobi cachina cuëdboc
padënquiobi ushadenquiocnoc chieshtopac cadenec. Cuëte dapa
bacuë idbud-idbudaid sedquid bimboecquid nano diadpec.

Ashobien aïdi chicshun: -Tsipis shëdmianquiopectac
-queshun aton sedquidi tsitoccabud-tsitoccabudpac cadenec,
ushacno. Adoaquien tic pictsecquo tsipispac cadenec,
pistsec.

Asho tantiashumbien: -Pistsecquo tsipisec.
Naimëdbudec -quetanquin tsucus-tsucusquiocnoc buanac
cadenec. Adoaquien ënëdpac cadenec. Tsipisenquo icpac
cadenec.

Adnubien dada umanuc puduentanequien cuëte dapa tapu
mabud shaën dëdaïd tanidadpac cadenec. Badiadte anuentsëqui
nepac cadenec. -Ma badiadbono -quec cuëte tayun ompodac
cadenec.

Adash tantiec tsadnubien tënquiampac cadenec ën ën ën
badiadnubi. Abi tënquetsëcquiec. Abi tënque- tsëcquiec.
Tsipis paëmbocnoc tsitoccaïd chictanquin secaïc tënquebudpac
cadenec.

Adtanequien tsipisec tic nuambo tsipispac cadenec,
naimëdec chiquidnubi. Adtanequien nes puduempac cadenec.

Pudentanquimbien nidaid uédeshcapac cadenec, nēbi matses nidnubi, shaën tauédeshcaboed utsiucbidi. Tic uédesh. Tic uédesh.

Adashien: -Ēndembi antapuashune catec, bon -quepac cadenec. -Cuesunec capatec, conī -quetanec puduedbon badiadbudpac cadeneec.

-¿Atotsi chiaid iso? -quequin chuimiaid

1. -Ēbi di utsi tshun -matsesēn cac ¿atotsi shaē quepac cadenec?
2. Di daēdpen chiec ¿mitsipadte nec quepac cadenec?
3. ¿Mitsi padectsi matses aīdbēdi diadtōpac cadenec?
4. ¿Atotsi quiash aīdbēd ushequi matses chieshtōpac cadenec?
5. Chieshtōshon ¿mitsipaden matsesēn napac cadenec?
6. Adoac ¿mitsipadpac cadenec shaē?
7. Tsitoccanec ¿mitsimbo matses cuempac cadenec?
8. Ompodshon isac ¿mitsipadōpac cadenec shaën?

Adnubien: -Nēmbōen tsauesēn tied iquec, caoshe. Isbidanec nidnu -quianec puduanec nidpac cadenec matses. Abi nīdec. Abi nīdec. Abi nīdec. Abi nīdec. Chuiboedquiobi masi podtepac cadenec.

Aid potebidanec podquedēn nidquimbi tsauestsen istuidpac cadenec.

Istuidquin isquien tied mēshec. Tuish, tuish, tuish. Tuish tosh tosh.

Aton cadi taneshcashobien: -Tu tu tu tu tutuapac cadenec. -Tu tu tu tu tu. Abi nidendac, mama tsaues -capac cadenec.

Adoaquien: -Con na nibēdacno tsaues catiapibi. ¿Padquidēndabi con na nibēdacno mama tsaues caben-cabenec?